



Paimân uási

Taan čoovčâ puoh enâmustáá mielân päccee virgetoimâi juávhust láá lamaš párnái teivâdmeh škovlâkollimijn pispetârhistem ohtâvuodâst. Párnái koččâmušah láá lamaš reháliih já toh láá kuoskâm puohlágán aššijd ”eennâm já alme kooskâst”: Láá-uv tust párnááh? Lii-uv suotâs leđe pispes? Mon ennuv pispes tienáá? Stuárráábij škovlâlij koččâmušah láá piejâm muu čovgâs sajan: Mii lii eellim tárguttâs? Mii tábáhtuvá jáämmim maŋa? Mii lii oskoldâhrijjâvuodâ já sänirijjâvuodâ koskâvuodâ? Mun lam irättâm västidiđ návt-uv vaigâdis koččâmuššáid nuuvt pyereest ko máátám.

Škovlâkollimijn must lii lamaš fáarust pispesuábbi. Ton vievâst mun lam muštâlâm pispes pargoost já tast, ete pispes nabdoo maŋgii paimânin. Pispesest lii suábbi, aabâs tego paimâniin Jeesus ääigi Alda-nuorttân. Paaimân poostij suábi verdijn suojâliđ čaggees piäđui vuástá. Suábi keijijn stivriimáin paaimân poostij toollâđ čage čuáhist. Suábi pajeosijn paaimân saatij kááijud uccâ lábbásii källeluámist. Mun lam muštâlâm, ete mahtnii siämmáá taha meid pispes paimânin. Suoijâl, stivree já tuárju servikuddijđ já ristâlijđ.

Tai juovlâi vyelni paimân uási lii sárnuttâm muu meid juovlâevangeliumist. Luukas juovlâevangelium paahud vistig aabâs uánihávt, ete ”ton kuávlust lijjii paimâneh iho vahtiimin čaggees”. Taah iho räi parges paimâneh palaskii kuittâg čuuvtij, ko Hiärá engâl čuázui sii oovdâst. ”Elleđ poolâ”, lâi engâl vuossâmuš saahâ palaskâm paimânáid.

Paloi meddâlistem ij kuittâg lamaš vala paimânij kuullâm váldusaahâ, peic tot lâi taat: ”Onne lii tijjân Taavvid kaavpugist šoddâm Pestee. Sun lii Kristus, Hiärrá. Taat lii merkkân tijjân : tij kavnavetteđ párnáá , kote viálláá seeimist kiesâlduvâi sist .” Ko lijjii kuullâm saavâ te paimâneh vuolgii huápust máátkán tuálvud saavâ ovdâskulij. ”Tääl Betlehemân!”, lâi sii toimâvuávám. Ij forgâ, ige itten, peic tääl tállán. Engâl almottem saahâ lâi nonnim paimâniid nuuvt čuuvtij, ete iä puáhtâm ájättállâđ.

Juovlâkovedâlmist paimâneh láá távjá uálgiroolist. Mun muštâm jieš-uv, ko kansaškoovlá juovlâjuhleest mun čuožžum váhá olgoláá sänvitakki pajalist já siholdâsâst kiessum kappeer uáivistân. Tuodâlávtt paimâniin lâi eromâš tehálâš uási vuossâmuu juovlâijjâ tábáhtusâin. Tot lâi sänituálvoo uási.

Paimâneh tiettii, ete sij kalgeh kavnáđ saje, kost páárnáš viállái seeimist. Ko sij kavniin párnáá, te sij muštálii tállán, ete mii sijjân lâi taan párnáást muštâlum. ”Puohah, kiäh kullii paimânij saavâid, hiámáskii.” Illá paimâneh lijjii kuáassin šoddâm jurdeđ, ete Immeel valjij eidu sii maailm historjá nubásmittes saavâ tuálvon.

Kuittâg eidu paimâneh ožžuu leđe vuossâmuuh ulmuuh, kiäh muštálii Jeesus šoddâmist. Paimânij ovdâskulij tuálvum saahâ lii pissoom siämmáálágánin paijeel 2000 ihheed! Tuáivu mielđ juovlâi ilosaahâ juksá meid tuu vááimu. Muu mielâst oro, ete tuot ilosaahâ lii kaskoo taan koskâttuvâi ain jolâbin nubásmeijee maailm äigikyevdilub ko kuáassin: ”Ele poolâ. Tunjin lii šoddâm Pestee!”

Sivnedum juovlah tunjin já tuu aldasáid!

Oulust ovdáláhháá advent 2019

Jukka Keskitalo
Oulu pispeskode pispes